
DISPUTATIO MEDICA
INAUGURALIS
DE
HEPATITIDE.

DISPUTATIO MEDICA

INAUGURALIS

DE

HEPATITIDE;

QUAM,

ANNUENTE SUMMO NUMINE,

EX AUCTORITATE REVERENDI ADMODUM VIRI,

D. GEORGII BAIRD, SS. T. P.

ACADEMIÆ EDINBURGENÆ PRÆFECTI;

N E C N O N

Amplissimi SENATUS ACADEMICI Consensu; et
Nobilissimæ FACULTATIS MEDICÆ Decreto;

Pro Gradu Doctoris,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

ERUDITORUM EXAMINI SUBJICIT

B R Y A N U S O'BEIRN

H I B E R N U S ,

C L A S S I S B R I T A N N I C Æ

C H I R U R G U S .

“ *Intus et in jecore ægro.*”


P E R S .

VIII. Calendas Julias, horâ locoque solitis.

EDINBURGI :

EXCUDEBANT ADAMUS NEILL ET SOCII.

1803.



Digitized by the Internet Archive
in 2020 with funding from
Wellcome Library

<https://archive.org/details/b31967267>

AMICO OPTIMO,

JACOBO CLEGHORN, M. D.

HIBERNO BRITANNIARUM REGIS MEDICO

PRIMARIO ;

ACADEMIÆ REGIÆ HIBERNÆ

SOCIO ;

IN

DUBLINIENSI SACROSANCTÆ TRINITATIS COLLEGIO,

ANATOMIÆ ET CHIRURGIÆ

REGIO NUPER PROFESSORI ;

VITÆ INTEGRITATE ET MORUM COMITATE

INSIGNI ;

HANC DISPUTATIONEM,

AMICITIÆ ET OBSERVANTIÆ

MONUMENTUM

D. D. D^{QUE}

BRYANUS O'BEIRN.

DISPUTATIO MEDICA

INAUGURALIS

DE

HEPATITIDE.

§ I. **D**E hepatis inflammatione, quam *HEPATITIDEM* nominant medici, paucis scribere, mihi consilium est ; eoque magis, quod mihi haud pridem contigit, in peregrina orbis terrarum parte, sub occidente sole, medicinam facere, et forsitan brevi meum sit, cum redardescat bellum, facere sub oriente, ubi hic morbus cum frequens est, tum lethalis.

II. *HEPATITIS*, ibi terrarum, advenas potissimum afficit, qui illuc ab *EUROPA* migrârunt ;

A

propterea,

proptereà, utì videtur, quòd, cùm corporis constitutione, tum viëtûs ratione et vitæ, indigenis opportuniore*s* sunt morbis, qui inflammationem habent.

III. Neque, enimvero, viliores ibi animantes ab hoc morbo prorsùs immunes sunt. Canes enim EUROPÆI, qui illuc cum heris commigrârunt, eo haud raro*s* corripiuntur et pereunt. Neque, profectò, hoc mirum: cùm, heros imitati, qui cœlum, trans mare currendo, non animum mutant, carnes quotidie incontinenter assumant, valetudinis improvidi, ventri obedientes.

DEFINITIO.

iv. OMNES ferè homines, qui de morbis scribunt, antè, quibus quisque signis cognoscatur, paucis verbis comprehendunt, quām signa narrant, causasve memorant; ostenduntve, quis eventus timendus sit, quis expectandus, quāve ægroto curatione subveniantur.

v. Nos itaque, tritâ viâ insequentes, *hepatitidem acutam*, de qua potissimum scribere nobis in animo est, CULLENI verbis definiemus.

vi. “ Pyrexia; hypochondrii dextri tensio
“ et dolor, sæpè pungens pleuritici instar, sæ-
“ piùs obtusus; dolor ad claviculam et sum-
“ mum

DE HEPATITIDE.

“ mum humeri dextri ; decubitus in sinistrum latus difficilis ; dyspnœa ; tussis siccata ; vomitus ; singultus *.”

vii. Signis *hepatitidis* SAUVAGESIUS † annumeravit *colorem faciei flavescentem* ; et insuper adjecit SAGARUS ‡ *urinas icteritas, biliosas, et serum sanguinis missi et crustam sufflavam* : sed, nostrâ opinione, perperam, cùm hæc signa non solùm imperpetua sint, sed etiam rarissima.

SE-

* Vid. CULLEN. *Synops. Nosolog. Method.* tom. II. Gen. xvii.

† Vid. SAUVAGES. *Nosolog. Method. Class. III.* Gen. xxiii.

‡ Vid. SAGAR. *System. Morbor. Symptomatic.* Class. xi. Gen. xiv.

...<-->...

SEDES.

viii. *HEPATIS* inflammationi alia aliàs sedes est ; atque, pro sede, alia aliàs signa. Utì enim *pulmonitis* potest esse, aut in ramis arteriæ *pulmonalis* dextro cordis ventriculo enatæ, qui purpureum in pulmones sanguinem distribuunt, ut vitalem mutationem subeat ; aut in ramis arteriarum *bronchialium* arteriâ magnâ ortarum, qui diffundunt coccineum in pulmones sanguinem, quo nutriantur : ità *hepatitis* potest esse, aut in ramis arteriæ *cœliacâ* enatæ, qui coccineum in jecur sanguinem, quo alatur, distribuunt ; aut in ramis *venæ portarum*, qui in hepar diffundunt acceptum à visceribus abdominis, quorum ope aut auxilio efficitur

efficitur *chylus*, sanguinem, ex quo bilis secer-
natur.

ix. Quin arteriæ hepatis inflammatione
haud raro afficiantur, nemo medicorum quis-
quam, quod novimus, dubitat. Venam vero
portarum unquam inflammatione affici, negat
BoëRHAAVIUS, quod, uti putat, "omnis sanguis
venosus ineptus est ad inflammationem ;
omnis sanguis venæ portæ est sanguis ve-
nosus : sed, postquam transivit per pulmo-
nes, ubi concutitur et compingitur, jam ad
finem arteriæ pulmonalis compactissimus
factus, hinc tum aptissimus evadit ad in-
flammationem ; hinc omnis inflamatio in
arteriis ab aorta oriundis, raro in pulmoni-
cis*."

x. Sunt autem medici, clari in primis,
LUDVIGIUS, nempè, **SWIETENIUS**, itemque
MONRO

* Vid. BoëRHAAV. *Prax. Medic.* § 914.

MONRO SECUNDUS; qui, in ramis itidem surculisque venæ portarum, qui hepar perreptant, nonnunquam, sed rariūs, oriri inflammationem, censeant.

xi. Liquida cera in venam portarum felicititer injecta, ex parte, uti novit SWIETENIUS, redit per arterias hepaticas. Hinc, uti putat, concludere licet, hæc vasa, inter se, hic illic, patere, et in alterutrisque posse oriri inflammationem. Veruntamen “effectus illi,” inquit, “qui fiunt à sanguine urgente loca inflammata, et simul sunt signa inflammationis præsentis, sæpè non adeò se manifestant, ubi in ramis venæ portarum hæret morbus; et hæc videtur causa esse, quarè quandoquè medici, in diagnosi hujus morbi, fallantur *.”

xii. Om-

* Vid. SWIETEN. *Comment. in BoëRHAAV. Aphorismi.* tom. iii. pag. 82.

xii. Omnem verò, de hac re, MONRO sustulit dubitationem. Ligatâ enim arteriâ hepaticâ, haud multò pòst, abdomine patefacto, in hepate inflammationem nihilo minùs ortam esse observavit *.

xiii. Quinetiam, inflammatio modò in gibba hepatis facie est, modò in concava ; atque non solùm GALenus †, sed etiam plerique, post illum, medicorum opinati sunt, alia mala ex gibba inflammata oriri, alia ex concava. Consentunt enim ferè omnes, quoties gibba facies inflammatione laborat, ægrum majore spirandi difficultate urgeri ; itemque dolore dextri lateris, ad jugulum usquè pertendente, et tussi : contrà, ubì in concava inhæret inflammatio, suspirio frequente, et defectu stomachi, affici ; etiamque nauseâ, importunâ siti, vomitu,

* Aud. ALEXAND. MONRON. SECUND. Prælect. *De Anat. et Chirurg. in ACAD. EDIN.*

† Vid. GALEN. *De locis affectis*, lib. v, cap. vii.

vomitū, et alvi profluvio *. Et, quoniam gibba facies septo transverso contigua est, eidemque, per ligamenta *peritonæo* orta, adhæret, dum concava partem stomachi et summum intestinum tegit ; inducimur, ut esse, uti dicunt auctores, credamus.

xiv. Inflammatio, porrò, aliquandò majorem jecoris lobum petit, aliquandò minorem ; at hunc, uti contendit FERRENIUS †, sæpiùs. Denique, acuta hepatis inflammatio tunicas potissimum afficit ; longa substantiam. Illa inflammatio, uti gravior est, ità citius aut resolvitur, aut abscedit : hæc, uti mitior, ità discussu difficilior, et sæpiùs, at seriùs, abit ad suppurationem.

B

SIG-

* Vid. SWIETEN. *Commentar. in BoëRHAAV. Aphorism.*
tom. III. pag. 82—3.

ETMULLER. *Abridgment of the Practice of Physic,*
Lib. I. Sect. XVIII. Art. V.

† Vid. *Histoire de l'Acad. Roy. des Sciences*, annor.
M,DCC,LXVI—LXVII—LXVIII. pag. 121.



S I G N A.

xv. His de sede *hepatitidis* dictis, nunc fusiùs dicendum est, quibus malis ægros hic morbus urgeat. Hæc, enimvero, tot sunt numero, ut haud facilè ad compendium conferri possint. Ne obscuri simus, in hac rei nostræ parte, memorabimus primùm, quæ mala in acuta jecoris inflammatione oriantur ; dein, quæ in vetusta seu longa.

xvi. *ACUTA.*—Incipiente hoc morbo, miseri mortales aliquandò nescientes, quid sibi sit rei, languidi, præter solitum, sunt ; oscitant subindè, simulque, horrore * quasi perrepen-
te,

* Vid. CELS. *De Medicin.* Lib. iv. Cap. viii.

te, omnia unà membra exporrigunt. Pigri etiam sunt, et ignavi ; neque, enimvero, raro corum corpora frigus vicissimque calor percurrunt.

xvii. Sæpiùs autem, ab initio, in dextro hypochondriorum et *epigastrio* dolor urget, neque tamen hæ partes extrinsecùs tument et decolorantur. Dolor modò acutus est et continuus ; modò tendens et pungens, et quoties, inter hauriendum spiritum, thorax ampliatur, multùm intenditur. Nonnunquàm obtusior est, et profundior. Aliquandò ad dextrum pectus pertendit, itemque ad dextrum jugulum et humerum *. Neque profectò, ut à CLARKIO accipimus, insolitum est, utraque hypochondria, prope spinam dorsi, dolere ; imò,

* Vid. ARETÆ. *De Caus. et Sign. Morbor. Acut.*
Lib. ii. Cap. vii.

CELS. *De Medicin.* Lib. iv. Cap. viii.

imò, vel sinistrum hypochondriorum solum,
et sinistrum humerum *.

xviii. Interdum dextra manuum torpore af-
ficitur †. Æger, præ dolore, utrisque lateri-
bus, at maximè sinistro, decumbendi impa-
tiens, dorso decumbit, dextrorsùm sese paulu-
lùm inclinans, capite simul et humeris subjec-
to pulvino suffultis ‡. Quinimò, utì certiores
nos facit FORESTUS, nonnunquam ne dorso
quidem diù decumbere potest ||.

xix. Haud

* Vid. THOM. CLARK. *Observations on the Nature and Cure of Fevers, and of Diseases of the WEST and EAST INDIES, and of AMERICA, &c.* pag. 65. Edit. EDIN. ann. M,DCCC,I.

† Vid. CELS. *De Medicin.* Lib. iv. Cap. viii.

‡ Vid. THOM. CLARK. *Observations, &c.* pag. 65.

|| Vid. FOREST. *Observation. et Curation. Medicinal.* Lib. xix. Observat. viii.

xix. Haud raro septum transversum, seu propter consensum, qui, per nervos, ei est cum hepate; seu quia, per membranas, quae ipsum et hepar connectunt, inflammationis participes, inflammatione afficitur; motus impatiens fit, neque, uti sanum solet, pulmonibus, in animam reciprocando, opitulatur*. Quod cum accidat, spiritus extrinsecus in pulmones, magno cum dolore, adducitur. Quintam, ægrum vexat sicca, frequens, at brevis tussis, quæ vicissim dolorem intendit. Angor simul urget, etiamque præcordiorum gravitas. Arteriæ solito imbecilliùs micant. Anima interdum deficit †.

xx. Aliquandò, vel ob contactum tunicarum, vel ob consortium, quod, per nervos, intercedit inter vicinas partes, stomachus et sumnum

* Vid. ARETÆ. *De Caus. et Sign. Acutor. Morbor.* Lib. ii. Cap. vii.

† Vid. BURSER. *Institution. Medicin. Practic.* Vol. iv. Part. Alter. § CLXXVI.

summum intestinum cum jecore consentiunt. Quo fit, ut, post cibum assumptum, stomachus, sicut nimis repletus, gravetur, atque inflentur præcordia. Quinetiam, æger biliosa quædam, acida, graveolenta eruſat; nauseat, et vomere, at sæpè fruſtrâ, conatur *. Interdum non ſolū biliosa quædam evomit, et ſingultu ferè strangulatur, ſed etiam fœdiſſimo afficitur alvi profluvio †.

xxi. Ventris proluvies aliquandò non, niſi paucos post dies, urgere incipit, quām indubia signa *hepatitidis* ſeſe oſtenderint; plerumquè verò hæc aut antegreditur, aut mox inſequitur ‡. Ægri ſimul, haud ſecūs ac dysenterici, moles-

* Vid. ARETÆ. *De Caus. et Sign. Morbor. Acutor.* Lib. II. Cap. VII.

† Vid. ARETÆ, loc. modò citat.

BURSER. *Institution. Medicin. Prædic.* Vol. IV.
Part. Alter. § CLXXVI.

‡ Vid. THOM. CLARK. *Observations, &c.* pag. 66.

molestissimo interdum ardore extremi recti intestini, et tenesmo cruciantur *.

xxii. Increscente morbo, si gibba tantùm hepatis pars afficitur inflammatione, summa cutis, sicut morbo regio, slavescit †. Tussis sicca magis urget. Accenditur major vis sitis. Febris continua est. Æger tranquillum nequit capere somnum ‡. Mens delirat, at haud ità multùm ; simulque torpida est, suspensa, et attonita ||.

xxiii. Sin concava facies inflammatione laborat, stomachus et suminum intestinum potissimum

* Vid. THOM. CLARK. *Observations, &c.* pag. 63.

† Vid. BURSER. *Institution. Medicin. Prædic.* Vol. iv. Part Alter. § CLXXVII.

‡ Vid. FOREST. *Observat. et Curat. Medicinal.* Lib. xix. Observat. viii.

|| Vid. ARETÆ. *De Caus. et Sig. Morb. Acut.* Lib. ii. Cap. vii.

tissimum vexantur. Superveniente enim morbo arquato, alvus tarda fit et astricta ; atque subalbida, et ea quidem subdura, cretamque cimoliam referentia, ægrè excernit. Pulsus arteriarum crebriores fiunt, et frequentior animæ defectus *. Arida, et albida lingua est : arida, et sicca cutis. Insedabilis urget sitis, neque raro in ore sapor ingratus. Urina subrubra est, parca, quasi bile inquinata ; et, frigescens, multum sedimenti deponit.

xxiv. *LONGA.*—Dictis præcipuis malis, quibus acuta hepatis inflammatio ægros urget ; proximum est, ut paucis narremus, quæ ægris mala afferat longa seu vetusta.

xxv. Utì longa jecoris inflammatio sœpè nulla, ut benè dixit CULLENUS, præbet signa,
quibus

* Vid. BURSER. *Institution. Medicin. Practic.* Vol. iv.
Part. Alter. § CLXXVII.

quibus dignoscatur, ità ejus historiam scribe-re, in primis arduum est et difficile ; ed magis, quòd nonnunquàm per hebdomadas, imò etiam menses, antè adest, quàm æger adversæ valetudinis conscius sit.

xxvi. Prima plerumquè mala, quibus ægros afficit longa hepatis inflammatio, nascuntur ex stomacho imbecillo, et ad rem alimentariam concoquendam parùm valido. Præ hac infirmitate, æger nauseâ matutinâ affectus, oblatos cibos fastidit. Imò, ne cibos quidem adulto die assumptos pòtest perficere ; quippe imbecillum stomachum sic flatu distendunt, ut, pòst paulò, crudos ructitet.

xxvii. Aliquandò, contrà, insolitâ fame urgente, cibos hepaticus avidissimè consumit ; atque, canino appetitu expleto, stomachus op-pressus, simulque spiritu distentus, crudam subindè molem eructat et ruminatur.

xxviii. Quinetiam, quibus obrepit hic morbus, eos tussis sicca, neque admodum crebra, divexat. Eorum insuper facies, etiamque summa ubique cutis, herbaceo colore tinguntur. Nonnunquam flavescent, sicut morbo regio affecti, quorum etiamnum color paululum in album vergit. Oculorum, qui non, ut sani, nitent, membrana, *ADNATA* dicta, faciei concolor est.

xxix. In *epigastrio* simul, dextroque hypochondriorum, dolor est ; qui hinc, ut in acuta jocinoris inflammatione, subindè ad latus dextrum, et ad jugulum humerumque lateris eiusdem, pervenit.

xxx. Quanquam, initio adversæ valetudinis, arteriarum pulsus ferè naturales sunt, æger tamen, mirum in modum, languescit, fitque ad solita munera invalidus. Alvis, etiam si plerumquè pigra ac spiritu distenta, haud tamen

tamen raro excernit biliosa, neque modo iis
convenientia, quæ assumuntur.

xxxI. Aeger, porrò, morosus est, durus, irritabilis, ad iram pronus, taciturnus, solitudinis appetentissimus. Tametsi somniculosus est, nequit tamen placidam quietem capere ; sed frequenter terrificis imaginibus subito excitatur, quibus sensus insomnes, aut insomniosi, specie rerum mentem decipiunt, animumque perpavefaciunt.

xxxII. Quinimo, æger ab imo pectore frequentia trahit suspiria, quanta haud raro spiritum interrumpunt. Arescunt gingivæ, durescuntque. Siccescit lingua. Arida fit, asperaque summa cutis. Urina solito coloratior est, at parciор. Alios magna vis sitis urget : alii non magis sitiunt, quam ex consuetudine.

xxxIII. Morbo

xxxiii. Morbo procedente, arteriæ crebriùs micant, et, advesperascente die, imbecilliùs. Præ hepatis tumore, qui nunc adeò magnus est nonnunquàm, ut tam oculi quàm digiti percipere possint, æger plerumquè spirandi difficultate permultùm afficitur, simulque magis vexatur tussi siccâ et asperâ. Quod autem mirum imprimis est, nequit, quamvis acerrimis sternutamentis irritentur nares, sternuere. Nonnunquàm tanta vis doloris urget, ut, in lecto, neutri laterum decumbere possit, sed pronus decumbat, genibus manibusque innixus.

xxxiv. Hepaticorum humeri, haud secùs ac phthisicorum, seriùs ociùs gibbosi fiunt; pectusque, ab antica parte, carinam simulat. Abscedit suppuratum jecur. Die in vesperam inclinante, febris intenditur. Nocturni sudores, diarrhœa diurna, vim, si qua superest, digerunt. Arteriarum motus fiunt imbecilli, et cùm vi tum temporibus inæquales. Neque

que multò pòst, miseri, insanabili tabe et mācie consumpti, fato cedunt.

xxxv. Præcipua mala, quibus mortales opprimit longa *hepatis* inflammatio, breviter memoravimus. Haud rarò autem pleraque ex his urgent, neque tamen ullo ægri vexantur dolore. Intereà tamen morbo incognito marcent magis quotidie magisque, demùmque lentâ morte consumuntur. Patefacto cadavere, medici tunc primùm cognoscunt, quo morbo periverint.

xxxvi. Hic loci, memoratu dignum est, uti *hepatitis* nonnunquam *gastritidem* et *pleuritidem* simulat, ità hos morbos *, itemque *peri-pneumoniam* †, interdum simulare *hepatitidem*.

Quinetiam,

* Vid. BURSER. *Institution. Medicin. Practic.* Vol. iv. Part. Alter. § CLXXXVIII.

† Vid. MORGAG. *De Sed. et Caus. Morbor.* Epist. xx. Artic. 30. et 31.

Quinetiam, aliquandò *hepatitis*, et unus aliusve ex his morbis, simul urgent. Quum ità sit, haud mirum est, eorum tam similitudine quàm consociatione non solùm medicos imperitos, sed et exercitatores, et usu callidos, nonnunquàm in errorem incidere *.

xxxvii. Denique, haud à re nostra erit hìc memorare, interdum *hepatitidem* simul et febrem intermittentem urgere. Hujusmodi mixtus morbus, apud monticolas INDIÆ ORIENTALIS, frequens est, et à medicis *MONTICOLARUM FEBRIS* appellatur. Febris incerto circuitu reddit. Inflammatio hepatis effectus febris videatur; et sæpiùs, utì dicunt auctores, sinistrum lobum afficit, quàm dextrum. Sitis urget. Incalescit corpus. Arteriarum ictus non solùm debiles sunt, et parvi, sed et temporibus inæquales.

* Vid. BURSER. loc. modò citat.

inæquales. Insolitus plenitudinis et gravitatis sensus est in dextro hypochondriorum, et *epigastrio*.

FINES.



F I N E S.

xxxviii. **H**EPATIS, juxtā atque aliarum partium, inflammatio, nonnunquām aut sponte aut medicinā discutitur. Aliàs autem, seu amicorum negligentiā, seu impotentiā medicinæ, seu medicorum imperitiā, seu ipsius violentiā pus movet, quod, abscessu dirupto, aliò aliàs, effluit. Aliquandò, sed forsitan rariùs quām ~~l m~~ credebatur, transit in duritiam; quæ misero, quod superest ævi, non solùm intolerabilis eri est, sed et plurimorum malorum causa.

xxxix. Quinetiam, interdum, inter suppurandum, sanguinis *fibrina* in hepatis faciem effunditur; atque partes contiguæ, per arterias venasque

venasque quæ per eam commeant, firmissimè cohærent. Denique, inflammatio hepatis aliquandò, uti dicunt auctores, at nostrâ opinione rarissimè, in gangrænam abit.

XL. Quum ita sit, à re nostra haud alienum erit, paucis dicere, quibus notis cognoscatur, ubi jecoris inflammatio in eo sit, ut discutatur; quæ suppurare, quæ abscessisse, indicent; quæ, partem inflamatam induruisse, testentur; quæ tristem gangrænam imminere, aut advenisse, denuncient; quas, denique, in partes ex abscessu pus erumpat. De his igitur ordine, pauca hīc loci dicere, nobis consilium est.

XLI. Hepatis inflammationem propè esse, ut digeratur, testantur signa post medicinam remittentia; sanguinis è naribus, et, si aucto-ribus habenda sit fides, præsertim è dextra, profusio; sudor toto æqualiter corpore sponte ortus; alvi fluxus biliosus; erysipelas; copio-

sum ex pectore sputum ; urina rubra sedimentum deponens : quibus accedant *hæmorhois*, et fœminarum fluores.

XLII. Interdum autem, ubi medicus non tempestivè arcessitus est, vel ubi inscientiâ medicinæ aut impotentiâ nihil potest arcessitus, inflammata hepatis pars abscedit. Hoc extimescendum esse, suspectur medicus, ubi horrores corpus subindè percurrunt ; ubi aliquanto pleniùs molliùsque micant arteriæ ; dum cætera interea mala nihil remittunt.

XLIII. Ubì autem pars inflammata jam abscessit, quod, remissione nullâ, seriùs modò, modò ociùs accidit, non solùm remittit dolor, et locus, quem jecur occupat, pondere onerari videtur ; sed etiam, unoquoque vespere, post horrores, febris intenditur, atque, tertiâ cujusque noctis vigiliâ, summa ubique cutis, haud secùs atque ea syntacticorum, sudore diffuit. Hinc macies ; hinc debilitas ; hinc oculorum et

et vultūs fœditas ; et, ne multis, hinc plurima mala, quibus tabescentes conficiuntur.

XLIV. Aliquando, uti dicunt auctores, hepatis inflammationi supervenit duritia. Ubì hoc accidit, tumidum hepar non solùm seipsum justo longius demittit, sed etiam, magnam abdominis partem occupando, detrudit contigua et vicina viscera. Quo fit, ut miser, ventricosus et onere gravatus, motūs segnis sit, pariter atque impatiens ; atque, seriùs ociùsve, plerumquè aut redardescente inflammatione brevi pereat, aut, hydrope tumidus, lentâ morte consumatur.

XLV. Sicubì, ut, teste **SANDERISIO**, interdum accidit, inflammatum jecur in gangrænam abeat, dolor, utcunque anteà vehemens, subito conquiescit ; et miser, spe cheu vanâ revalescendi delusus ! cibos appetit, oblatos assumit, cum gratulantibus amicis colloquitur ; nescius, quanto discrimine versetur, et aliquo forsitan

forsitan negotio, præclarive facinoris famâ frustrà intentus.

XLVI. Intereà autem motus arteriarum cele-
res, debiles, tam vi quàm temporibus inæqua-
les ; extremitates membrorum inalgescentes ;
animæ defectus ; cadaverosa facies ; neque ra-
rò virides dejectiones, medicum monent, de
ægro, fati securò, actum esse, neque procùl
abesse mortem.

XLVII. Ubì penetrális jecoris pars suppura-
vit, pus nonnunquàm, nullâ viâ peresâ, quâ
effluat, ex abscessu à vasis bibulis absorbetur ;
atque, per ductos hinc tubos, in sanguinem
transmissum, *hecticam* movet, lentâque tabe
ægrum consumit. Aliàs autem erodit sibi
viam in cola fellea ; et, per ductum ex his
conjunctis profectum, in sumnum intestinum
perlabitur, atque fœdissimam, vix aut ne vix
quidem sanabilem, movet alvi proluviem.

XLVIII. Quòd

XLVIII. Quòd si superficies jecinoris suppuravit, pus, parietibus abscessûs peresis, in aliam aliâs partem erumpit; pro parte supputata, et prout hæc, necne, vicinarum partium alicui coaluerit.

XLIX. Ubì gibbera hepatis superficies, inter suppurrandum, adhæserit membranæ costas spurias investienti, suppurratum extrorsùm extuberat; et pus, eroso abdominis pariete, extrorsùm effunditur. Unus enimvero, nauta ebriosus, COWPERO teste, memoratur, cuius simul ventriculo, et dextro abdominis parieti concreverat suppurratum hepar; et cuius omnes cibi et potus, paucos ante mortem dies, per erosa abdominis tegmina extrorsùm effluebant.

L. Cùm gibbera hepatis facies accrevit septo transverso, pus, hoc pereso, in saccum *pleu-*

ræ effluit *. Nonnunquam inflammatio ex gibba hepatis parte, per septum transversum, permeat in dextrum pulmonum; quo fieri possit, ut pus posteà ex abscessu in spiramenta animæ infundatur, et, per asperam arteriam ex his pertinentem extussitum, suppuratæ peripneumoniæ, pulmonumve tabis similitudine, medicos decipiat †.

LI. Quòd si concava jecoris facies, inter suppurrandum, concrevit ventriculo, aut summo intestino, aut intestino sinuato; pus, perrosis abscessus parietibus, in unam harum partium
aut

* Vid. MORGAGN. *De Sed. et Caus. Morbor. Epistol.* xxxvi. Artic. 4.

THOM. CLARK. *Observations, &c.* pag. 189.

† Vid. MORGAGN. *De Sed. et Caus. Morbor. Epistol.* xx. Artic. 31.

MACLEAN. *Dissert. Inaug. De Hepatitis in ACAD. EDIN.*

THOM. CLARK. *Observations, &c.* pag. 167.
233. 234.

aut aliam illabitur, undè aut evomitur, aut dejicitur. Modò, ut interdum, pars concava vesicæ felleæ accreverit, pus in hanc erumpit, et, per felleam hinc viam ductam, in summum intestinum permanat, undè suprà aut infrâ transmittitur.

LII. Quoties, id sanè quod pessimum est, pars jocinoris suppurata nulli vicinarum partium adhæsit ; pus ex perroso abscessu effluit in saccum *peritonæi*, et, haud longo post tempore, morte ægrum afficit. Imò interdum hujusmodi effusio subitam mortem affert ; atque, patefacto abdomine post mortem, magna vis puris in *peritonæi* sacco conspicitur.



INSPECTA CADAVERA.

LIII. PROXIMUM est, ut brevitè exponamus, quæ morbida, incisis cadaveribus eorum, quos abstulit *hepatitis*, secreta rimantium oculis obveniant.

LIV. Jecur ipsum plerumquè, vel ex toto, vel ex parte, tumidum * est, supra quam sanguinem

* Vid. FRIDERIC. HOFFMAN. *Oper. Omn.* Edit. ann. M,DCC,XL.

THOM. CLARK. *Observations, &c.* pag. 175.
180. 189. 194. 201. 202. 203. 210. 220.

num solet; nonnunquam pallidum *, et induratum †. Interdum septo transverso adhaeret ‡, interdum contigo parieti abdominis ||; modò stomacho, modò summo intestino; aliquandò intestino sinuatò §, aliquandò vesicæ felleæ, aliquandò dextro renum ¶.

E LV. Quin-

* Vid. FRIDERIC. HOFFMAN. *Oper. Omn.* edit. ann. M, OCC, XL.

• THOM. CLARK. *Observations, &c.* pag. 215.

† Vid. FRIDERIC. HOFFMAN. *Oper. Omn.*

THOM. CLARK. *Observations, &c.* pag. 215.

‡ Vid. THOM. CLARK. *Observations, &c.* pag. 167.

|| Vid. THOM. CLARK. *Observations, &c.* pag. 201.
202. 212—213.

§ Vid. THOM. CLARK. *Observations, &c.* pag. 198.

¶ Vid. THOM. CLARK. *Observations, &c.* pag. 161.
MACLEAN. Dissert. Inaug. *De Hepatitide in
ACAD. EDIN.*

Lv. Quinetiam aliàs pus in abscessu contînetur * : aliàs, abscessu dirupto aut perroso, conspicitur effusum aut in saccum *pleuræ* † ; aut in animæ spiramenta pulmonum dextri ‡ ; aut in saccum *peritonæi* || ; aut in ventriculum ; aut in summum intestinum ; aut in sinuatum intestinum ; aut in vesicam felleam ; aut in cola fellea, quæ in ductum hepaticum coëunt.

LVI. Vicinæ,

* Vid. THOM. CLARK. *Observations, &c.* pag. 175.
180. 194. 196—197. 202. 203. 210. 220—221.

† Vid. MORGAGN. *De Sed. et Caus. Morbor. Epistol.*
XXXVI. Artic. 4.

THOM. CLARK. *Observations, &c.* pag. 189.

‡ Vid. THOM. CLARK. *Observations, &c.* pag. 167.
MACLEAN. *Dissert. Inaug. De Hepatitis, in*
ACAD. EDIN.

|| Vid. FRIDERIC. HOFFMAN. *Oper. Omn.*

LVI. Vicinæ, porrò, partes, aliàs aliæ, aliàsque alitèr, morbidæ conspiciuntur. Nunc glandulæ *mesentericæ*, quàm naturales, duriusculæ et majusculæ sunt: nunc splen tumidus, imò sano duplò major *; imò etiam, ut semel præsens vidit GREGORIUS, pondere octodecim libris æqualis. Interdum humor susflavus, serove assimilis, inter cor et *pericardium* interfluit †: interdum pulmonum dexter contiguæ costarum *pleuræ* longè latèque, per internata vasa, firmiter adhæret ‡. Jam livet, hic illuc, septum transversum: jam vesica fellea, itemque fellea hinc directa via, per quam fel permanat in summum intestinum, inflammationis vestigia

* Vid. MORGAGN. *De Sed. et Caus. Morbor. Epistol.* xxxvi. Artic. 4.

† Vid MACLEAN. *Dissert. Inaug. De Hepatitis*, in *ACAD. EDIN.*

‡ Vid. MACLEAN. *Dissert. Inaug. De Hepatitis*, in *ACAD. EDIN.*

vestigia ostendunt. Haud raro pleniora intestina aliquantum aliquantulumve morbida, et praeter naturam constricta, observantur *.

* Vid. THOM. CLARK. *Observations, &c.* pag. 190.
194, 196—197. 201. 202. 210. 212—213, 215.

CAUSÆ.



CAUSÆ.

LVII. NUNC ad eam rei propositæ partem pervenimus, in qua considerandum est, non solùm ex qua abdita causa, quibusque evidentiis, oriatur morbus, quem agitamus, sed etiam, quæ cum causa contineat. De his autem compressius dicere, nobis in animo est; eoque magis, quòd veremur, ne partes jam absolutas latiùs persecuti videamur.

LVIII. *Abdita*—causa, seu ea quæ reddit mortales ad hepatis inflammationem opportunos, in quadam corporis proprietate consistit. Quid verò hæc sit, accuratè et lucidè expondere imprimis difficulte est. Neque, enim vero, hoc m:rum; cùm præsertim corporis proprietates,

tates, quas faciant ætas, sexus, temperamen-
tum, cœlum, vitæ et victûs ratio, tam multæ
sint, finibusque tam exiguis aut obscuris inter
se divisæ, ut neque HIPPOCRATES eas discer-
nere sciatur, neque valeat loquax FABIUS narra-
re. Quis perspicax NEUTONUS potest scien-
tèr distinguere lubricos colores, quibus colum-
bæ versicoloribus collis illudunt mirantium
oculis? Quis solers REYNOLDIUS çallet luso-
rios scitè discretèque depingere?

LIX. Satis tamen constat, in calidis regioni-
bus, in quibus potissimum mortales hepatis
inflammatione afficiuntur, fœminas rarissimè
corripi, impuberes ferè nunquam. Tympano-
tribæ legionis centesimæ primæ in INDIA ORI-
ENTALI merentis, omnino viginti et omnes
impuberes, manebant, ut à GIRDLESTONIO ac-
cipimus, morbo hepatico immunes. Sed quam-
obrèm impuberibus parcit morbus hepatarius?
Quia nondum amare et potare insuérunt; nec-
dum, ut inconcessis voluptatibus libidines ex-
pleant,

pleant, totas noctes pervigilare, et furtim ea facere aut ferre, quibus incontinentium corpora sæpè debilitantur.

LX. Quinetiam, ut jamdudum medicis plus satè innotuit, in calidis INDIARUM cœlis, advenæ, qui EUROPA illuc immigrârunt famam aut opes quarentes, aptiores, quâm indigenæ, sunt, qui jecoris inflammationem experiantur. Quoniam enim illi cœlum, non animum mutant trans mare currendo, primo adventu suo stomacho, ut domi, vivere incipiunt, atque ingurgitare carnes et vinum; delectati, post durum maris, dies noctesque luculentè habere cum peregrinantibus civibus et amicis. Canes herorum comites et imitatores, uti sunt luxurici socii, ita morborum participes siunt, et hepatico morbo luunt vituperandam gulæ indulgentiam. Indigenæ, quoniam cœli naturæ convenienter vivunt, à carnibus pariter atque mero abstinentes, rarissimè hepatariis morbis exercentur. Quin igitur valetudini consulti,

tis, EUROPÆI ; et, mutato cœlo, contemnitis quoque gulæ invitamenta, atque, contentis appetitionibus, salubri indulgetis temperantiæ ?

LXI. Ex EUROPÆIS advenis, adulti, ætate-
ve valentes, robusti, sanguineo temperamento,
quorum corpora hauddum duris belli, aut mor-
bis, aut profusis cupidinibus debilitata sunt,
acutâ magis hepatis inflammatione tentantur :
longâ, contrâ, naturâ imbecilliores ; tempera-
mento melancholici ; ebriosi ; militiâ, cœli in-
temperantiâ, furtivisve amoribus infirmati.

LXII. His cognitis et consideratis, nobis vi-
detur, aut naturâ, aut vitæ victûsque ratione,
aut cœli temperie et moribus, quendam esse
corporis habitum EUROPÆIS communem, i-
temque communes quasdam cupiditates ; qui-
bus, ubi in INDIIS peregrinantur, sunt, præ
indigenis, præcipue aboriginibus, apti, quos
hepatici morbi incessant et superent.

LXIII. Evi-

LXIII. *EVIDENTES*—causæ morbi, quem persequimur, numero plurimæ sunt. I^eius generis præcipue, ab auctoribus memoratæ, sunt, calva fracta et depressa; jecur extrinsecus percussum aut vulneratum; jecoris duritiae; concreti fellea in colis hepaticis inhærentia; irrequietæ *ascarides*, quæ prædabundæ ex alvo, per ductum felleum, in hepar perrepereunt; corpus calidum frigori, præcipue nocturno, expositum; somnus nocte super fronde viridi; intestinorum difficultates inscientè curatæ; diæta prava, astringens, concoctu diffcilis; intemperatus hydrargyri usus; subitæ tempestatis varietates; febres intermittentes et remittentes, quæ, hepar indurando, haud raro longam ejus inflammationem movent.

LXIV. Causis quoque, quibus excitatur *hepatitis*, ab auctoribus annumeratur intensus calor: nostrâ verò opinione, perperam; quippe cùm multo verisimilius videatur, potius mortales aptos reddere, qui hunc morbum nanciscantur.

tur. Inducti sumus, ut ita opinaremur, quòd EUROPÆI, qui, domo profugi, in INDIAS immigrârunt, rarò hepatico morbo exercentur; modò æqualis calor sit, neque meridiani solis ictibus se temerè objiciant: et quòd, uti certiores nos facit LINDIUS, in maritima ora COROMANDELICA, ubi non solum victus insalubrior est, sed etiam tempestas inconstantior, et solis atque arenæ æstu siccior, plures nautarum EUROPÆORUM morbo hepatico corripiuntur et intereunt, quam BENGALENSI, ubi, uti salubrior victus est, ita constantius cœlum; quamvis utrisque oris ferè æqualis sit vis caloris.

LXV. *CONTINENS*—causa, seu proxima, *hepatitidis*, juxta ac cæterarum inflammationum, inter medicos, in varijs partes disputata est. Sed haudquam nobis vacat, inter STAHLIANOS, BOËRHAVIANOS, et CULLENIANOS, lites componere, eorumve certaminibus nosmet inserere; eoque minùs, quòd complures jam hujus Academiæ alumni eorum opiniones, opinionesve

nationesve potius, argumentis refutârint *, iisdemque SMITHIUS facetissimè illuserit †.

LXVI. Iis, enimvero, assentimur, qui existimant, causam, quæ jecoris, pariter atque cæterarum partium, inflammationem continet, esse *COMPARATIVAM* partis arteriarum *DEBILITATEM*; præ qua, nequeunt sanguinem eâdem ratione transmittere, quâ in ipsas ab arteriis majoribus, à corde profectis, impellitur. Quid autem significet hujusmodi debilitas, BROUNIUS,

DONALDSONIUS,

* Vid. BROU. Disput. Inaug. *De Ophthalmia*, § XL.
EDIN. ann. M,DCC,CCV.

DONALDSON. Disp. Inaug. *De Rheumatismo*,
§ XLV—LIII. EDIN. ann. M,DCCC,I.

BROCK. Disput. Inaug. *De Phrenitide*, § LI—LVIII. GLASG. ann. M,DCCC,I.

† Vid. SMITH. Disput. Inaug. *De Pneumonia*, § XLVI.
EDIN. ann. M,DCCC,II.

DONALDSONIUS*, BROCKIUS †, nostrâ opinione, adeò lucidè explanârunt, ut esset tempus terere, de ea fusiùs dicere.

* Vid. DONALDSON. Disput. Inaug. *De Rheumatismo*, § LV. et LVI.

† Vid. BROCK. Disput. Inaug. *De Phrenitide*, § LXI. et LXII.



DIAGNOSIS.

LXVII. NUNC paucis dicendum est, quomodo *hepatitis* dignoscatur ab iis morbis, qui notis quibusdam eam simulant. Morbi autem, quibus quarundam notarum communitas est cum hoc, sunt *pleuritis* dextri lateris, *dyspepsia*, *gastritis*, colicus dolor quem movet spasmus, *rheumatismus*. De his igitur, ordine, pauca dicemus.

LXVIII. *PLEURITIDI* dextri lateris quamvis haud pauca communia sint, cum *hepatitide*; utrique tamen propria quædam sunt, quibus internoscantur.

LXIX. In

LXIX. In illo morborum, dolor rarissimè infra sextam costam urget ; in hoc, rarissimè supra. Dolor lateris haud raro, huc illuc thoracis, vagatur ; et spiritu in pulmonem ducendo plurimum intenditur : dolor hepatis, nisi ubi ad *clavicularum* dextram, et sumnum dextrum humerum immigrat, in una sede inhæret, et haud ita multum spiritu hauriendo exasperatur. Pleuriticus, porrò, non tantâ vi doloris urgetur, ubi in sanum latus decumbit, quantâ hepaticus. Tussis, quæ pleuriticum vexat, superquam quod est post initium humida, cœbrior multo et vehementior est eâ, quæ hepaticum ; et interdum, quod emolitur, id strias sanguinis intermixtas continet.

LXX. Quinetiam hepatico, pleuritico non item, ex compresso hypochondriorum dextro dolent *clavicularum* dextra, sumnumque dextri humeri. Ad hoc, jecur inflamatum, superquam quod dextrum hypochondriorum tumefacit et gravat, plerumquæ demittit se palulum ;

lulūm ; imò, nonnunquām usquè eð, ut acutus margo admotis digitis persentiri possit. Hepatario, denique, inorbo urgente, pleuritico non item, nonnunquām alvus biliosam materialam tam suprà transmittit, quām infrà ; atque album oculorum, simulque cutis suffunduntur sufflavo colore.

LXXI. Ægrorum autem haud multūm interest, rectè, necne, dignoscat medicus, utro morborum exerceantur : quoniam utriusque, uti eadem sēpē causā excitantur, ita eadem plerumquè requirunt curationem.

LXXII. *DysPEPSIA*—tot communia sunt cum longa hepatis inflammatione, ut peritissimi nonnunquām medici animorum incerti sint, utrā ægri laborent. Hos tamen morbos internoscere summi momenti est, quia eadem utrisque curatio nequaquam convenit.

LXXIII. Me-

LXXIII. Medici animorum dubii, ægrumne maceret cibos coquendi impotentia, an longa hepatis inflammatio, debent ab eo percunctari, an in sanum latus decumbere nequeat; an dextrum hypochondriorum tanquam pondere onerari videatur, et ex compressione urgeatur gravi dolore, qui hinc pertendit ad dextram *clavicularum*, et summum dextrum humerum; an perurgeat febris; et, si perurgeat, an interdiu aliquantum remittat, noctu ingravescat: nam, si, ita sanè, respondebit, sat erit, undè concludant, eum longo morbo hepatario tabescere. Oportet autem medicos præterea observare, num facies pallida sit, vultus tristis et lugubris; num alba oculorum sufflavo colore suffundantur; numque palpebrarum radices orbitæ luridæ circumeant: haud enim dubium erit, modò hæc insuper accesserint mala, quin hepar occupaverit et depascat longa inflammatio.

LXXIV. *GASTRITIS*—et acuta concavæ sinistri jecoris lobi faciei inflammatio, sede aliquantum similia sunt, at facilè tamen possunt distingui. Qui enim stomachi inflammatione urgentur, ii, at non item jecoris inflammatione correpti, cibos pariter et potus, vixdùm devo-ratos, revomunt ; et summà anxietate, simulque dolore ac ardore vix tolerandis in stoma-cho et præcordiis, affliguntur. Quinetiam, viribus morbi gravitate emorientibus, citè, mirum in modum, fatiscunt ; verùm interea tamen corum neque sumnum dextrum humerum dolor identidem percellit, neque *clavicu-larum* dextram, ut hepatis inflammatione la-borantium.

LXXV. *COLICUS DOLOR*,—quem movet spas-mus, ab inflammatione quæ in concava jecoris parte insidet, nonnunquam vix distingui po-test. Ubi enim sinuatum intestinum, spasio affectum, obstat, quò minùs stercus descendat, dolor, sicut is quem excitat hepatis inflamma-

tio, obtusus et levis est, atque alvus tarda et dura; simulque æger in neutrum latus potest, sine incommodo, decumbere. Tanta, enimvero, his morbis signorum communitas est, ut, nisi dolor à dextro hypochondriorum identidem pertendat ad dextram *claviculam*, et summam partem dextri humeri, medicus animi dubius sit, uter ægrum urgeat.

LXXVI. Quoties sic de morbo dubitat medicus, debet percontari, quæ ægrum mala premant; à quibus initiis inceperit adversa valedudo; quæ dein nova mala, et quo ordine, accesserint: nam ex horum notitia plerumquè poterit perspicere, utrùm colicus dolor ægrum exerceat, an jecoris inflammatio.

LXXVII. *RHEUMATISMUS*,—an jecinoris inflammatio urgeat, discernere haud difficile est medico, qui pernoscat, quæ mala, quibusque ea partibus, uterque morborum afferat. Dolores, quos moyet *rheumatismus*, potissimum musculos

musculos discruciant, et haud raro, per eos, rursum prorsum pervagantur. Musculos autem discrucinati, neque interea tussi vexantur, neque spiritus difficultate, neque dolore dextram *clavicularum*, sumnumque dextrum humerum subinde percellente; quibus sanè malis urgentur *hepatitide* laborantes. Quinetiam, dolores dextri hypochondriorum, quibus non nunquam vexantur *rheumatismo* afflicti, hoc corporis mitigantur positu, illo exacerbantur; atque ingravescentibus artuum doloribus remittunt, vicissimque ingravescunt remittentibus.

RATIO



RATIO SIGNORUM.

LXXVIII. RES videtur postulare, ut, cæterorum morem imitati, qui hujusmodi scriptis operam impenderunt, hic loci signa electè, ut quæque expositu dignissima videntur, breviter explanemus.

LXXIX. *Prærexia*—idcirco hepatis, pariter ac cæterorum viscerum, inflammationem comitatur; quòd hinc, per nervos, omne corpus, præsertim cor et arteriæ, incitatur supra modum, quem secunda valetudo requirat.

LXXX. *Hypocondriorum dextri tensio*—undè? Ex vasis sanè inflamatæ partis sanguine,

guine, præter solitum, impletis atque disten-
tis; quo sit, ut æger perindè sentiat, ac si, ibi
abdominis, satis spatii jecinori decesset.

LXXXI. *Dolor pungens*—ubi haeret, et undè
oritur? Haeret in hepatis tunicis; imprimis
eâ peritonæ ortâ, quæ, præ densitate, vasis
sanguine turgescentibus obstinatè renititur.
Vasorum igitur nervi sanguine distenti, simul-
que sanguine pariter, pariterque renitentibus
membranis compressi, acutissimum persen-
tiunt dolorem, *pungentem* ex similitudine ap-
tè nominatum; qualem partes naturâ mollio-
res, distentionisque patientiores, non experi-
untur.

LXXXII. *Dolor obtusus*—insidet jecoris sub-
stantiæ; quæ, utpote mollior et laxior, vasis
sanguine tumescentibus faciliùs cedit. Qua-
propter, nervis minùs distentis et compressis,
æger hebetiore multò dolore afficitur, quem
translato verbo *obtusum* appellat.

LXXXIII. *Do-*

LXXXIII. *DOLOR AD DEXTRUM HUMERUM*—relatus, undè? An ex inflammatione permanente à hepate, per septum transversum, ad *mediastinum*? Vero idcirco absimile hoc est, quòd dolor illuc pertendit, etiam ubì nondùm huc perrepsit inflammatio. Multo igitur verisimilius est, dextrum humerum et *claviculam* dolorem participare, ob consensum, qui, per nervos septi transversi, præsertim dextros *phrenicos*, his partibus intercedit cum hepate. Ut enim duo spatia corporave, quæ magnitudine idem tertium æquant, sunt ipsa ejusdem magnitudinis; ita duæ partes corporis, quæ, per nervos, cum eadem tertia consentiunt, voluptates, pariter atque dolores, altera alterius, participant.

LXXXIV. *DECUBITUS IN SINISTRUM LATU* DIFICILIS.—Corpore in sinistrum latus decumbente, ubì gibba facies hepatis inflammatur, ligamentum dextrum, itemque medium *suspensorium*, ipsa fortassè aliquantū inflamata,

mata, pondere ejus visceris distenduntur, vicissimque inflamatam ejus tunicarum partem distendunt; ubi concava, pars morbida hinc ipso hepate superjacente comprimitur, illinc resistentibus contiguis visceribus, quæ, præ costis sinistris superjacentis corporis pondere minùs mobilibus, ei minùs cedunt.

LXXXV. *Dyspnœa*--acutâ hepatis inflammatione affectos urget, quòd, inter spiritum hau- riendum, demissum septum transversum hepar detrudit, et supernè comprimit; inter emittendum, sublevatum septum transversum distendit connectentes, forsitanque inflammatas membranas, et, per eas, inflammatas tunicas hepatis, dum simul cætera viscera, incumbe- tium muscularum contractione protrusa, hepar comprimunt infernè.

LXXXVI. Jecoris longâ inflammatione affecti aucta ipsa moles impedit, ne descendat, uti debet, septum transversum; quo fit, ut hepati-
cus

cus non possit unoquoque spiritu tantam animam ducere, quantam valetudo requirat, ideoque, crebriùs ducere coactus, sicuti suspiriosus anhelat et fatigatur.

LXXXVII. *Tussis*—hepaticos identidem vexat, quòd, præ spirandi difficultate, quâ urgenter, sanguis non potest facile, ut in sano solet, per pulmones permanare. Ejus verò motum expediendi gratiâ, mirando Naturæ artificio *laryngis* musculi, per nervos, cum laborantibus pulmonibus consentiunt, et cum *laryngis* musculis, musculi, per quos anima ducitur et redditur: quo fit, ut, motu sanguinis per pulmones undecunquè difficiili, musculi *laryngis* irritentur; et musculi spirandi, irritationis participes, in breves vehementesque subindè motus cieantur, quibus efficitur tussis, et sic navent operam, ut per pulmones sanguis expeditius permeet.

LXXXVIII. *Vomitu*—identidem vexantur hepatici, ubi concavæ hepatis superficieï inhæret inflammatio; aut quia tumefactum hepar stomachum gravat; aut quia partis inflammatae calor eum, præter solitum, stimulat; aut quia calor insolitus contigui hepatis inflammati in eo inflammationem excitat; aut quia, ut interdum, morbida vis bilis à hepate secreta, per ductum hinc profectum, in summum intestinum permanat, atque, verso hujus motu, in stomachum perlabitur, eumque in motus abnormes ciet.

LXXXIX. *SINGULTUS*,—qui, ubi gibbera hepatis superficies inflammatur, hepaticos perurget, oritur ex septo transverso, inflammatae hepatis tunicæ aut inflammationem, aut saltem per nervos dolorem, participante. Subitæ, et iteratæ hujus septi muscularum contractiunculæ, *SINGULTUS* nominantur; quod sanè nomen, apud veteres quosdam scriptores, videtur cæ-

terorum quoque muscularum contractiunculis commune fuisse ; quippe apud quos, *SINGULTUS NERVORUM* idem planè valeret, quod, apud recentiores, *SUBSULTUS TENDINUM*.

PRO-



PROGNOSIS.

xc. PRIUSQUAM curationem morbi, quem tractamus, exsequi conamur, idoneum est breviter proponere, quæ notæ spe animum erigant, quæ metu deprimant. Nam, ut benè dicit SMITHIUS, “ quid medicis proficit cognos-
“ cere morbos, et scire facultates medicamen-
“ torum usumque medendi, nisi didicerint
“ callidè præscire et prædicere, sanabilis, nec-
“ ne, quisque morbus sit, salusne quemque æ-
“ grum maneat, an mors *.”

xci. Ubi

* Vid. ROBERT. SMITH. Disput. Inaug. *De Pneumonia*, EDIN. M,DCCC,II. § LXXII.

xci. Ubì æger, etiamnum juvenis, nondùm morbis, vel diutinâ in fervidis regionibus peregrinatione, vel duro labore, vel victus venefisve intemperantiâ, debilitatus est, necdum mœrore adversâve fortunâ animum fractus; bonum est. Etenim nulla dum causa apparet, cur ipse despondeat animum, salutive medicus desperet.

xcii. Licet quoque scire, non periclitari ægrum, si graviora mala, quibus urgetur, biliosâ alvi profusione levantur, vel sanguinis profluvio, vel copioso sudore toto corpore oriente. Quoties enim mala sic levantur, est, quarè speremus, inflammationem propè esse, ut discussiatur, et fore, ut revalescat æger.

xciii. At, contrâ, malum est, ubì hepaticus seu morbis, seu cœli gravitate locique vicio, seu inconsideratâ indulgentiâ, multùm infirmatus

firmatus est. Quippe, tametsi levia initio mala urgeant, hepar tamen, nisi efficacibus remediis et medicamentis digeratur inflammatio, brevi plerumquè tempore abscedit, aut indurescit.

xciv. Neque verò bonum est, opportunâ medicinâ non levari mala, quibus hepatici urgentur, et non redire pristinum colorem. Hinc enim patet, tantam esse vim inflammationis, quantam medicina nequeat discutere ; et necesse esse, aut suppuratione aut duritia superveniat.

xcv. Periculosum est, ubì non solùm dextrum hypochondriorum, sed etiam summus dexter humerus, *clavicularumque* dextra, ingente vi doloris urgentur ; ubì vehemens et perpetua ferè tussis vexat, simulque magna spirandi difficultas. Pessimi quoque morbi indicia

indiciâ sunt, ingens cutis fervor, celerrimi et duri arteriarum iictus, mentis alienatio, alvus dura et compressa, cutis arida. Hæc enim mala ostendunt, ægrum in lubrico versari ; et, nisi lenis precibus APOLLO, aliusve quispiam opifer DÆUS adsit, et periculo subtrahat, propè esse, ut morte rapiatur.

xcvi. Longâ hepatis inflammatione affectis salutem polliceri licet, dummodò medicinæ efficaciâ, vel constitutionis bonitate, vel temperatoris cœli indulgentiâ, vel domum reditione, vel omnibus simul, pristinum colorem recuperent ; atque venter, eodem quotidie tempore, quo secundâ valetudine solebat, reddit stercus, molle, figuratum, modo conveniens his quæ assumuntur, neque fœditate odoris simile stercus sani hominis excedens.

XCVII. Rarissimè autem servari possunt, ubì sive ipsorum negligentia, sive medici imperitiā, sive medicinæ impotentiā, sive vi morbi ipsâ, sive omnibus simul, hepar jam abscessit. Etenim, ubì eò perventum est inveterationis, pus ex abscessu absorptum, tabefacto sanguine, *hecticam* movet; quæ, vires in dies depasta, vitam demùm ipsam absument.

XCVIII. At non tamen semper ex suppuratione hepate mors accidit. Nonnunquam enim, vel postquam pus, pariete abscessus vicinisque partibus perrosis, in spiramenta animæ, aut in stomachum, aut intestinum summum sinuatumve, aut extrorsum per contiguum abdominis parietem, perrupit; ulcerus, præ rarâ quâdam seu medicinæ, seu corporis ipsius constitutionis bonitate, renatâ substantiâ solidescit, atque macilentus et extenuatus æger revalescet paucimque

latimque pristinam valetudinem et vigorem redipiscitur. Misero autem, cuius in *pleuræ* aut *peritonæi* saccum pus ex abscessu perlabitur, nulla spes superest, nulla salus.



CURATIO.

XCIX. RESTAT, ut nunc breviter dicamus, quæ acutæ hepatis inflammationi conveniat curatio; dein, quæ longæ seu vetustæ. His enim inflammationibus, uti medicos edocuit experientia, eadem curatio nequaquam idonea est.

c. ACUTÆ CURATIO.—Acuta jecoris inflammatio quamprimum discutienda est, ne aut in suppurationem abeat, aut in duritiam.

ci. *Abstinentia.*—Hoc (c.) consilio, æger debet abstinere ab omnibus esculentis et potulentis, quæ cor et arterias stimulant; quippe cùm inflammationem aggravent, impedianque ne prosint medicamenta et reme-

dia. Quinetiam, dum est carnium et vini, et cæterorum omnium ciborum et potuum incitantium abstemius, oportet cavere, ne caloris et frigoris vicissitudinibus se committat, et hinc inflammationem eò gravitatis perducat, ut eam digerere medicina non possit.

cii. *Sanguinis detractio*.—Quò discutiatur inflammatio, sanguis, ineunte morbo, detrahendus est. Debet mitti, plagâ amplâ, et pleno rivo; nam comperti sunt medici, sanguinem sic missum plùs ad inflammationem digerendam pollere, quàm sanguinem eâdem copiâ detractum, plagâ exiguâ, et minuto rivo.

ciii. Quantum sanguinis mittendum sit, medicus judicat ex cognita morbi vi et ratione, et consideratis ægri viribus. Ut enim digeratur inflammatio, oportet, venâ semel iterumve incisâ, eam copiam sanguinis mittere, quam illius vis requirat, et ægri vires pati posse

posse videantur. Debilium, quorum vires non ferre possunt tantam ex brachio sanguinis jacturam, quantam desideret vis morbi, ex dextro hypochondriorum, ministris cucurbitulis cum ferro, aut hirudinibus, sanguinis pauxillum elicere, utile erit. Hoc quidem auxilium minus efficax est; at magis tutum, ideoque, quoties vehementiore uti non licet, anteferendum.

civ. *Exulceratio*—quoque dextri hypochondriorum, ad acutam jecinoris inflammationem discutiendam multum valet. Ei itaque parti, post sanguinem detractum, et vim inflammationis aliquantum minutam, emplastrum exulceratorium superponendum est.

cv. Quomodo exulceratoria ad inflammations reconditarum partium digerendas conducant, inter medicos discrepat. Nonnulli contendunt, inflammations discutere demendo materiam ex corpore, et sic pacando nimios

mios motus cordis et arteriarum: alii, spas-
mum solvendo, quo extremitates arteriarum
inflammatarum partium constringi existi-
mant: nonnulli, cor, et arterias ab eo ad
partem inflamatam pertinentes, sic stimu-
lando, ut vi à tergo sanguis per arterias in-
flammatas propellatur: nonnulli, denique, ut
CULLENUS, sanguinem, ex parte interna in-
flammata, extrorsùm ad cutem æqualiter to-
tam derivando. Nobis videtur, exulceratio-
nem his omnibus modis ad inflammationes in-
ternarum partium discutiendas conferre; sed
præsertim, derivando sanguinem ad superfi-
ciem, ob mirum consensum, qui, ut ostendit
CULLENUS, omnibus partibus cutis intercedit
cum parte exulcerata.

cvi. *Purgatio*—quoque acutâ hepatis in-
flammatione laborantibus utile remedium est:
cùm præsertim non solùm eorum alvum, quæ
plerumquè tarda est, in salutares motus cieat,
quibus fæces expellantur; sed etiam, demen-
do

do materiam ex corpore, haud parùm possit ad resolvendam inflammationem.

cvii. Medicamenta maximè idonea, ex quibus duo hæc simul commoda accipient hepatici, sunt cathartica mitiora et refrigerantia. Hujusmodi sunt *sales secundarii*, nominatim *sulphas sodæ*, *sulphas magnesiæ*, *phosphas sodæ*, *tartris potassæ*, *supertartris potassæ*, *tartris sodæ*. Siquandò, ut interdum, hæc medicamenta parùm ad alvum movendam pollent, iis substituenda sunt efficaciora; velut *submuriæ hydrargyri*, vel *jalapa*. Quò optatò respondeant cathartica, ægri debent dilutas potiones, videlicet aquam decoctam ex hordeo, vel ex oryza, affatim bibere.

cviii. *Refrigeratio*—item nonnihil contribuit ad acutam hepatis inflammationem discutiendam. Tutissima refrigerantia sunt, acida nativa ex iis parata, quæ gignuntur è terra; velut succus malorum aureorum, in alorum citreorum,

rum, *tamarindorum*, *uvarum*, et his consimilium. His accedat *sal secundarius*, nempè *citras potassæ*. Hæc refrigerantia, superquàm quòd calorem sedant, et nimios cordis atque arteriarum motus; haud raro lenem sudorem eliciunt, et sic duplice modo conducunt ad inflammationem digerendam.

CIX. *Salivatio*.—In INDIA ORIENTALI, ubi plures mortalium inflammatione jecoris laborant, quàm in cæteris cognitis orbis terrarum partibus; medici, post vim morbi detractione sanguinis, aliisque remediis quæ memoravimus, mitigatam, solent, secundo tertiove morbi die, salivam movere: comperti, nullâ aliâ æquè ratione posse præcavere, ne hepar abscedat, aut indurescat. Quò salivam cieant, præcipiunt hepatariis, ut *submuriatem hydrargyri* devorent, simulque dextro hypochondriorum, aut feminibus *cœruleum ex hydrargo unguentum* infrient, usquè èd, ut os incalescat et salivet.

CX. Ubì

cx. Ubì medicamenta et remedia, quæ diximus, ad spem non responderunt, et hepar abscessit, atque abscessus extrorsùm extuberat; oportet, plagâ peritè factâ, pus emittere, dein idoneâ curatione sanare ulcus.

cxi. LONGÆ CURATIO.—Optima, à quibus auxilium accipient longâ jecoris inflammatione laborantes, sunt, ut medicos edocuit experientia, *submurias hydrargyri* devoratus, aut *cæruleum ex hydrargyro unguentum* summæ cuti infrictum, donec salivam lenitèr moveat:—*acidum nitricum*, copiâ duarum drachmarum aquæ bilibrâ dilutarum, quotidie, per complures hebdomadas continuas, assumptum:—amara, scilicet aqua ex maceratis *chamæmeli* floribus; pulvis ex *colomba*, aut aqua ex ea, aut distillatus ex ea humor:—opium, si alvus nimis fluat; sin astricta sit, cathartica suprà dicta, aut, dummodò perimbecillus sit stomachus, aloë:—diæta ex materia yalente et

et leví:—exercitatio lenis, sereno cœlo:—
profectio ex calidis orbis terrarum partibus,
in temperatores; præsertim INDIIS patriam
EUROPÆAM redditio.

F I N I S.

